

թիւն» (triple alliance) եւ մէկ միացեալ բանակ ուղարկեն Հայաստան :

3. Որովհետեւ օգնական ուժերը Եւրոպայից դէպի Հայաստան անցնել կարող են միմիայն Լեհաստանով ու Ռուսաստանով, ուստի Եռեակ Դաշնակցութիւնը զօրք անցկացնելու իրաւունք պիտի ստանայ Լեհաստանի թագաւորից եւ Մոսկուայի մեծ իշխանից¹⁾ :

4. Ձեռնարկութեան մասին մինչեւ վերջին վայրկեանը Եռեակ Դաշնակցութիւնը պէտք է մեծ դադտնութիւն պահպանի : Անգամ Լեհաստանի թագաւորը եւ Ռուսաստանի մեծ իշխանը չպէտք է այդ մասին առաջուց իմանան, որովհետեւ դա կարող է մեծ գայրոյթ պատճառել նրանց : Լեհաստանի թագաւորին նրա համար, որ 15 տարի առաջ նա ցանկացաւ 30,000 զօրք ուղարկել եւ Հայաստանը զբաւել, եթէ Ղափանի իշխանները այդ բանը կամենային : Իսկ նրանք այդ չկամեցան, որովհետեւ սաստիկ ատում էին լեհերին :

Հետաքրքրական է այդ ատելութեան պատճառը : Հարիւր տարի առաջ — ասում է յիշեալ յուշագիրը — լեհական ծառայութեան մէջ կար 30 հազարանոց մէկ հայկական բանակ՝ զօրեղ, քաջ եւ յաղթական : Վախենալով թէ մի դուրս է մի օր Լեհաստանի տէրը դառնայ այդ բանակը, լեհերը տմարդօրէն ոչնչացրին նրան : Պատերազմ ունենալով թաթարների հետ, նրանք զադտնի համաձայնութեան եկան նրանց հետ եւ մի օր, կռուի դաշտում, հայկական բանակը երկու կողմից իրենց մէջ առնելով, դաւադիրօրէն կոտորեցին : Ազատուեցին միայն 2000 հոգի : Այդ օրուանից ահա հայերն ատում են լեհերին եւ ո՛չ մի վստահութիւն չունին դէպի նրանց :

Մոսկուայի մեծ դուքսի գայրոյթի պատճառն էլ այն է, որ նա՝ Մոսկուայի մեծ դուքսը՝ ամուսնացած լինելով վրացական մէկ իշխանուհու հետ, 50,000 մարդ ուղարկեց վրացիներին, որ սրանք գնան եւ Հայաստանը զբա-

ւեն : Սակայն հայ իշխանները չկամեցան անձնատուր լինել վրացիներին, որովհետեւ այդպիսով հայոց եկեղեցին պիտի ընդունէր յունադաւանութիւնը, որը լի է բազմաթիւ ազանդներով ու հերձուածներով :

5. Եւրոպական զօրքի պարէնն ու ձիերի կերը ամենուրեք կը մատակարարեն հայերը — սկսած նրանց շարժուելու օրից :

6. Դաշնակից ուժերը 1700 թուի Մայիսի վերջերին պիտի ճանապարհուեն Եւրոպայից անցնելով Բոհեմիա, Լեհաստան, Ռուսաստան, Մոսկուայում նաև կը նստեն եւ Վօլգայով կը դան մինչեւ Կասպից ծովի Հաջի Թարկան (Աստրախան) նաւահանգիստը : Նոյն նաւերով երկու կամ երեք օրում Աստրախանից կը հասնին մի նոր նաւահանգիստ, Շամախուց 20, իսկ Բազուից 10 մղոն հեռու, որը եւ կազմում է Հայաստանի սահմանը :

7. Նոյն տարուան Հոկտեմբերի սկիզբներին նրանք պիտի լինին Բազում եւ այդտեղից զադտնի հասնին Շամախի, որը մէկ մեծ, հարուստ եւ առեւտրական քաղաք է, ինչպէս Քէօնը, բայց առանց ամբողջիւնների եւ պաշտպանութեան :

Այնտեղ նստում է պարսից նահանգապետը (gouverneur), ունենալով մօտաւորապէս 30 մարդ : «Անհաւատները» մի ժամ էլ չեն կարող դիմադրել, որովհետեւ քաղաքում կան 7 հայ համայնքներ . բոլոր վաճառականներն ու առեւտրականները հայեր են : Հէնց որ դաշնակից դրօշակները ծածանին, քաղաքից դուրս կը դան ու նրանց կը միանան 10,000 հայեր, բոլորն էլ սպառազէն ու հեծեալ :

8. Շամախին կազմում է Հայաստանի սահմանը եւ պատկանում է Հայաստանին : Այդտեղից դուրս գալով, զօրքը պիտի բաժանուի չորս մասի եւ արագօրէն շարժուի չորս ուղղութեամբ : Առաջին բանակը պիտի գնայ Գանձակի վրայ, ուր նստում է մէկ նահանգապետ մօտաւորապէս 30 մարդով : Քաղաքը չունի որեւէ պաշտպանութիւն : Երջակայքի ազգաբնակչութիւնը բոլորն էլ քրիստոնեաներ են :

Երկրորդ բանակը կը շարժուի ուղիղ դէպի Լոռի, ուր մի քաղաքում նստում է խանը, առանց զօրքի ու պաշտպանութեան : Երրորդը՝ դէպի Ղափան, որը նոյնպէս անպաշտպան է .

1) Մի շարք փաստաթղթերի մէջ Ռուսաստանը միշտ կոչւում է Մոսկովիա, Ռուսները՝ Մոսկովիտներ, իսկ կանոնց թագաւորը՝ Մոսկովիայի կամ Մոսկովիտների մեծ իշխան (Le grand duc des Moscovites) :